

3 JUAN

¹Ancianojon, mic ts'ijbubeñet ili jun c'uxbibilet bΛ Gayo mu' bΛ j c'uxbiñet ti isujm. ²C'uxbibilet bΛ, mic pejcañeñet Dios cha'an puro uts'at ma' ñusan q'uin, cha'an chΛn c'oq'uet che' bajche' an i c'oc'lel a ch'ujlel. ³Wen tijicña tsa cubi che' bΛ tsa' juliyoj la quermanojob i subeñon cha'an xuc'ulet ti isujm. Woliyet ti xΛmbal ti' sujmllel Dios. ⁴Che' mi cubin woliyoj ti xΛmbal ti' sujmllel jini calobilob, wen tijicñayon. Ma'anic chuqui mi' ñumen tijicñesañon.

Uts'at woli' mel Gayo che' mi' payob ochel

⁵C'uxbibil bΛ, xuc'ul wola' mel che' ma' p'untan la quermanojob yic'ot jini mach bΛ cambilobic a cha'an. ⁶Woli' pam subob ti' tojlel xñopt'añob bajche' an a c'uxbiya. Uts'at wola' mel che' ma' coltañob majlel che' bajche' yom cha'an i ye'tel Dios. ⁷Come tsa'ix loq'uiyoj majlel cha'an Jesús. Ma'anic chuqui tsi' ch'Λmbeyob ti' c'Λb jini sajtemo' bΛ. ⁸Jini cha'an, yom mi lac payob ochel cha'an che' jini tem x'e'telonla yic'otob ti' sujmllel.

Jini Diótreres woli' contrajiñob

⁹Tsa'ix c ts'ijbubeyob jini mu' bΛ i tempañob i bΛ. Pero jini Diótreres

mu' bΛ i mulan i wa'chocon i bΛ che' bajche' yumal ti' tojlelob, ma'anic mi' p'ison lojon ti' wenta. ¹⁰Jini cha'an che' mic tilel, mi caj c cha' c'ajtesΛbeñob chuqui woli' mel Diótreres. Woli' cha'len jop't'an ti laj contra. Mach cojic jach jini. Mach yomic i pay ochel la quermanojob ja'el. Mi' tic' ja'el jini yomo' bΛ i payob ochel. Mi' chocob loq'uel ti templo.

Uts' at bajche' woli' mel jini Demetrio

¹¹C'uxbibilet bΛ, mach a tsajcan jontolil. Tsajcan chuqui uts'at. Jini mu' bΛ i cha'len chuqui uts'at i cha'añach Dios. Jini mu' bΛ i cha'len jontolil, ma'anic tsi' q'uele Dios. ¹²Uts'at bajche' woli' mel jini Demetrio. Pejtelel winicob mi' yΛlob uts'at mi' mel che' bajche' cΛntesΛbil cha'an i sujmllel Dios. Che'Λch mic sub lojon ja'el. A wujil isujmΛch chuqui mic sub lojon. ¹³Anto cabal chuqui com c ts'ijbubeñet. Pero mach comic c ts'ijban ti tinta yic'ot ti pluma. ¹⁴Mach jalic com j q'uelet cha'an mi lac pejcan lac bΛ che' temel añonla. ¹⁵La' ajnic i ñach'tilel i pusic'al Dios ti a pusic'al. Lac pi'Λlob mi' yΛq'ueñet cortesía. Aq'uen cortesía lac pi'Λlob ti' c'aba' ti jujuntiquil.